



Inatsisartunut ilaasortaq Nivi Rosing,  
Inuit Ataqtigiit

Tjenestemandit soraarnerussutisiaat pillugit § 37 naapertorlugu apeqquteqaammut nr.  
153 2026-imut akissut

Brevdato: 17-09-2026  
Sagsnr.: 2026-14288

Matumuuna akissut

P. O. Box 1037  
3900 Nuuk  
Tel. (+299) 34 50 00  
E-mail: oed@nanoq.gl  
www.naalakkersuisut.gl

**1. UKA24-mi imm. 57 innersuullugu Naalakkersuisunut apeqqutiginiarpara  
taassunga tunngasumik Naalakkersuisut suliamik nangititsiniarnersut.**

2024-mi Ukiakkut ataatsimiinnermi immikkoortoq 57, tulliuuttoq taasinnermi  
sammineqarluni 2024-mi oktobarip 23.-ani siullermeerneqarpoq:

*Namminersornerullutik Oqartussani, Kommuninilu nunatsinni  
tjenestemandit pillugit Inatsisartut Inatsisaata § 55-ip imm. 1-ip  
allanngortinneqarnissaanut tunngasumik nalunaarusioqqullugit  
Naalakkersuisut peqquneqarnissaannik Inatsisartut aalajangiiffigisassaattut  
siunnersuut, taamaaliornikkut nunatsinni tjenestemandit, danskit  
naalagaaffiata nunatsinni tjenestemandinut malittarisassai malillugit  
tjenestemandisut soraarnerussutisiaqalersinnaaleqqullugit, taamaattorli  
tapeqartitsisoqassalluni soraarnerussutisiaqaataasussanit  
aningaasarsianinngaaniit %-mik aaliangersimasumik angissusilikkamik,  
taamaaliornikkut nunatsinni, qallunaat nunaannilu tjenestemandit  
soraarnerussutisiaqarnikkut assigiinngissutaasup nalimmassarneqarnissaa  
anguniarneqassalluni. Naligiinngissutaasoq nalimmassarniarlugu,  
tapeqaataasussap qanoq annertutiginissaa aammalu kommuninut,  
namminersorlutilu oqartussanut qanoq aningaasatigut naleqassanersoq  
nalunaarusiami UKA25 sioqqullugu tunniunneqartussami  
ersarissarneqassaaq. Tamatumuungattaq ilanngullugu nunatsinni qassit,  
tjenestemandinut isumaqatigiissut naapertorlugu  
atorfinitinneqarsimanersut nalunaarusiami ersarissarneqassaaq.*

Tamakkiisumik isiginninnissaq qulakkeerumallugu kiisalu suliaq aallartinneqareersoq  
ingerlateqqikkumallugu, siullermeerinninnermi taamanikkut Naalakkersuisuusut  
tulliuuttut allannguutissatut siunnersuummik saqqummiussipput:

*"Tjenestemanditsinnut aaqqissuussinnermi oqaluttuarisaanermi patsisinik  
nassuiaammik Naalakkersuisut suliaqarnissaat pillugu Inatsisartuni  
aalajangiiffigisassatut siunnersuut. Nassuiaammi qallunaat kalaallilu  
inatsisaat kiisalu tjenestemandinut immikkoortumi allaffissornikkut periutsit  
oqaluttuarisaanermi maannakkullu atuuttunik isiginnilluni  
nalilersorneqassapput. Tamatuma saniatigut naalagaaffiup nunatsinni  
atorfittarisimasaanut tjenestemandit soraarnerussutisianik Kalaallit  
Nunaata Danmarkillu akornanni assigiissaariniarluni suliniutit  
aallartereersut, naammassinnittuunersut nassuiaammi  
nalilersorneqassaaq, taamaattoqarsimanngippallu aaqqiissutissatullu*

*siunnersuutiniq saqqummiussilluni. Nassuiaat UKA2025-mi tunniunneqassaaq."*

Suliaq Aningaasaqarnermut Akileraartarnermullu Ataatsimiititaliamit oqaluuserineqartussanngorlugu innersuunneqarpoq, 2025-mili marsip 11-ani qinersisoqartinnagu ataatsimiititaliaq isumaliutissiisummik tunniussissalluni angumerinngitsoorpaa, soorluttaaq suliaq aappassaaneerineqanngitsoq. Taamaalilluni suliaassatut siunnersuutigineqartut taakkua arlaannaannilluunniit Naalakkersuisut suliaqaaquneqarnissaat pillugu Inatsisartut akuersissuteqanngillat.

Inatsisartut siunnersuummik oqaluuserinninnerinut atatillugu taamanikkut Aningaasaqarnermut Akileraartarnermullu Naalakkersuisuusooq allakkatigut akissuteqarluni, Kalaallit Nunaanni tjenestemandit soraarnerussutisiaat tunniunneqarsimasut aaqqiissuteqarfigineqannginnerat naqqiuteqarfigaa. Allakkatigut akissuteqaat tamakkiisooq atuarniaraanni [www.ina.gl](http://www.ina.gl) innersuussutigineqarpoq.

**a. Aappiuppat suliaq sumut killippa?**

Apeqput nr. 1, litra b-mut akissut takuuk.

**b. Naamiuppat nangitsisimannginneq sumik peqquteqarpa?**

Siunnersuutigineqaaqartoq Inatsisartut naammassillugu oqaluuserinikuunngimmassuk, taamaalillunilu siunnersuut inaarutaasumik akuersissutiginikuunngimmassuk imaluunniit itigartitsissutiginikuunngimmassuk aallartinneqanngilaq. Apeqput 4-mut akissut aamma takuuk.

**2. Suliaq naammassineqassappat suna amigaatigineqarpa aamma suna aporfiusinnaava?**

Apeqput 1-imut kiisalu apeqput nr. 1, litra b-mut akissutit takukkit.

**3. Nunatta karsianut kinguneqassava?**

Siunnersuutip kingunerisinnaasai pillugit annerusumik naatsorsuisoqanngilaq, taamaattumillu aalajangiiffigisassatut siunnersuutaqqaartup aningaasatigut kingunissaannik siunnersuuteqartup naliliinera kisiat innersuussutigineqarsinnaalluni.

**4. Tassunga tunngasumik Naalakkersuisut allamik oqaasissaqarpat?**


Siuliani UKA2024/57-ip siullermeerneqarnerata kingorna, tjenestemandit soraarnerit Kalaallit Nunaanni najugaqartut tamarmik, 2026-milu apriliip aallaqqaataani soraarninngortussat, tjenestemandit Danmarkimi najugaqartut assigalugit soraarnerussutisiaat naatsorsorneqartussanngorlugit aamma aaqqinneqartussanngorlugit, inatsisip atuuttup allanngortinnissaa danskit folketingiata akuersissutiginikuuaat. Inatsisissatut siunnersuut, inaarutaasorlu Folketingip nittartagaani atuarneqarsinnaavoq<sup>1</sup>.

Ilanngullugu paasissutissiissutigineqarsinnaavoq, danskit aamma kalaallit tjenestemanditut soraarnerussutisiaasa oqaluttuassartaatigut, teknikkikkullu assigiinngissutaat pillugit allakkiornissaaq pillugu siulima danskit taamanikkut naalakkersuisorisai isumaqatigiissuteqarfigimmagit. Allakkiaq ataatsimoorussamik

<sup>1</sup> [https://www.ft.dk/samling/20251/lovforslag/L26/som\\_vedtaget.htm](https://www.ft.dk/samling/20251/lovforslag/L26/som_vedtaget.htm)

tusagassiorfinnut nalunaarummi eqqaaneqarpoq<sup>2</sup>. Kalaallit Nunaanni aamma Danmarkimi najugallit tjenestemanditut soraarnerussutisiaasa naligiilernissaannut, allakkiami aaqqiissutissatut siunnersuuteqartussaavoq. Danmarkimi qinersineq aamma Aningaasaqarnermut Sulisoqarnermullu Aqutsisoqarfimmi sulisunik amigaateqarneq patsisaallutik allakkiornissaq kinguaattooqqavoq. Medarbejder- og Kompetencestyrelsen aamma Aningaasaqarnermut Sulisoqarnermullu Aqutsisoqarfiup suleqatigiinnerisigut allakkiaq massakkut allanneqaleruttorpoq.

Inussiarnersumik inuulluaqqusillunga



Aqqaaluaq B. Egede

---

<sup>2</sup> <https://fm.dk/nyheder/nyhedsarkiv/2026/februar/regeringen-indgaar-aftale-om-ligestilling-af-loen-og-ansaettelsesvilkaar-for-statens-tjenestemaend-i-groenland/>